



Na Voorzitter di Tweede Kamer di Staten-Generaal
Postbus 20018
2500 EA
Den Haag

www.rijksoverheid.nl
www.facebook.com/minbzk
www.twitter.com/minbzk
[www.linkedin.com/company/
ministerie-van-bzk](https://www.linkedin.com/company/ministerie-van-bzk)

Kenmerk

Bo kenmerk

Fecha 23 di juni 2023

Referente Carta proximo trayecto disculpa pasado di sclavitud

Introduccion

Cu e carta aki nos ta informa bo Kamer tocante e contenido adicional di e próximo trayecto, a base di e disculpa pa pasado di sclavitud. Cu esaki nos ta cumpli tambe cu e compromiso cu minister di Asunto Interno y Relacion di Reino (di aki pa dilanti: BZK) a haci na bo Kamer durante e debate di 25 di januari ultimo pa informa bo tocante esaki prome cu zomer.

Na 19 december sociedad a pone hopi atencion riba pasado di sclavitud y su impacto. Esaki ta tuma luga den preparacion pa Aña di Conmemoracion di Pasado di Sclavitud. Kabinet tin un gran aprecio pa tur esnan cu den e periodo despues di disculpa a dedica nan mes pa sigui duna atencion permanente na pasado di sclavitud. Nos ta constata tambe cu tin mas y mas reconocimiento y aprecio pa esnan cu pa tanto tempo a lucha pa mas visibilidad pa pasado di sclavitud. Siña compronde pasado miho y duna husticia na esnan den pasado y presente cu a contribui na nos comprension actual di pasado di sclavitud. Esaki ta tambe e motivacion importante pa e esfuerzo cu kabinet ta haci durante Aña di Conmemoracion di Sclavitud y den e hopi combersacion explorativo cu nos a tene cu comunidad den e periodo despues di e disculpa. Cu como meta sigui logra mas conocimiento, reconocimiento y consciencia permanente tocante e pasado aki den henter reino, y den relacion cu otro pais cu cua Hulanda ta conecta via di e pasado aki.

Den e carta aki nos ta wak bek lihe riba e disculpa di 19 di december y riba esencia di e combersacionnan cu Kabinet tabata tin for di e momento ey. Ademá nos ta informa bo tocante e plan pa e contenido adicional di e fondo di €200 milyon.¹ Meta di e proceso aki ta pa e arreglo di subsidio pa iniciativa comunitario y e Comité di Conmemoracion (di aki pa dilanti: Comité) ta activo den zomer di 2024. Pa logra un contenido adecua, Kabinet ta contempla un proceso participativo den cua descendiente y otro persona involvi ta para central den tur etapa di instalacion di e fondo y e Comité.

¹ Manera a informa anteriormente den reaccion di Kabinet di dia 19 di december ultimo, no ta trata aki di un fondo di presupuesto basa riba articulo 2.11 di e Comptabiliteitswet.

Pa finalisa, nos ta informa bo tambe tocante e progreso den preparacion di Aña di Conmemoracion di Pasado di Sclavitud, Museo Nacional di Sclavitud y intensificacion relaciona cu maneho contra discriminacion y racismo.

Reflexion y combersacion for di 19 di december

Riba 19 di december di aña pasa, prome minister Rutte, na nomber di gobierno, a pidi disculpa pa involucramento y rol di Estado Hulandes y su predesornan gubernamental historico relaciona cu pasado di sclavitud, na tur descendiente mundialmente, y postumo y na nan descendientenan cu ainda awendia ta experenciado consecuencia di e pasado aki. Den reaccion di Kabinet, cu a compaña e rapport di Grupo di Dialogo di Pasado di Sclavitud, Kabinet a pone un fondo di €200 miyon disponibel. Meta ta pa e medionan aki ta di alcansabel facilmente y ampliamente accibibel y cu pasado di sclavitud trans-Atlantico ta e scope, cu un enfoca riba Suriname y Reino. Di e suma aki, €100 miyon ta designa pa un arreglo di subsidio pa iniciativa comunitario. E otro €100 miyon ta reserva pa implementacion di medida pa conocimiento y consciencia, reconocimiento y conmemora, y e efecto y procesamento cu a anuncia den e reaccion di Kabinet anteriormente.

Ademas, Kabinet a stipula structuralmente un suma di €8 miyon pa aña pa instalacion y trabou di un Comite di Conmemoracion, cu continuamente lo supervisa di manera permanente un conmemoracion di pasado di sclavitud digno y mas grandi, cu ta abarca henter Reino, unda posibel den cooperacion cu Suriname riba e tereno aki. Programacion y destino di tur medida existente ta tuma luga den colaboracion cu descendiente y otro persona involvi. Mas trempan den aña, minister di BZK a informa Kamber tocante e contenido desea di e articulo di presupuesto bou di cua e fondo di €200 miyon y e Comite ta incorpora.²

Kabinet a tene combersacion den e periodo pasa cu descendiente y otro persona involvi na Hulanda, na Aruba, Curaçao, Bonaire, Sint Maarten, Sint Eustatius, Saba y na Suriname via e Speciaal Gezant Slavernijverleden institui pa ministerio di Relacion di Reino. Riba 15 di juni aña pasa, Kabinet a combersa atrobe cu un grupo amplio di descendiente y otro persona involvi cu ken nos a papia durante e sesionnan di Catshuis den preparacion pa e disculpa, y tambe despues. Pa siña tocante nificacion di e disculpa, pero tambe pa haya mas comprension di e deseo y necesidadnan pa duna contenido na e proceso "despues di coma". Tur combersacion tabata un pa un impresionante, y for di cua ta bira mas cla ainda cu e disculpa ta solamente un prome paso riba un caminda largo pa sanacion y procesamento.

Maske den mayoria di caso ta mira e disculpa como un paso positivo, hopi hende ta experencia cu ta te awor tambe pa prome biaha ta duna mas reconocimiento publicamente na e dolor y tristesa relaciona cu e pasado aki. Te cu recientemente a sinti poco espacio pa esaki. E mesun combersacionnan tambe ta subraya cu e historia aki ta basa riba orguyo y forsa; riba resistencia y resiliencia di comunidad cu a sigui mantene nan mes den condicion cruel. Nos ta gradicido pa e

² Kamerstukken, Vergaderjaar 2022–2023, 36284, Nr. 28.

transparencia cu cual nos partnernan di combersacion a hiba nos den nan storianan. E houding aki ta pidi tambe di kabinet un postura habri cu ta haci posibel pa bin mas cerca otro den confiansa.

Tabata combersacion necesario, y tin biaha tabata tin confrontacion cu, como liña cora, e pregunta con berdaderamente Kabinet lo duna contenido na e disculpa haci. For di e combersacionnan aki, a resulta e siguiente puntonan di salida cu nos ta tuma na cuenta den e proceso di continuacion:

- Atencion pa e proceso ta na prome lugar. Den esaki mester tin suficiente atencion pa diversidad den necesidad y deseo di parti di diferente comunidad. E atencion aki ta costa tempo, cu tin biaha ta bay contra di e 'logica di Den Haag' existente, pero na mes momento ta señala como un condicion necesario pa hopi partido cu ta participa den e combersacionnan. Por lo tanto e siguiente diseño di proceso ta percura participacion activo di descendiente y otro persona cu ta involvi den tur fase di e proximo trayecto. Na mes momento nos ta sigui traha riba e cumplimento di e otro compromisonan, pa asina tambe por financia iniciativanan den parti Caribense di Reino.
- Despues di 19 di december, e dialogo social a amplia y profundisa, den cua e comunidadnan manera e comunidad Marron y comunidadnan Indigeno, enfaticamente ta pidi atencion pa nan posicion y nan storianan. Kabinet ta presta atencion na esaki y ta tuma esakinan explicitamente na cuenta den e proximo proceso. Kabinet ta consciente cu den e dialogo social tocante pasado di sclavitud, otro comunidad tambe ta pidi atencion pa *nan* storianan como parti di nos pasado comun. Pa esakinan tambe tin espacio den cuadro di Aña di Conmemoracion di Pasado di Sclavitud. Na mes momento, esaki no mester hiba na causa un represion di e experiencia y reconocibilidad di e pasado di sclavitud trans-Atlantico. E iniciativa di e Aña di Conmemoracion ta pa contribui na un conscientizacion mas amplio y e combersacion tocante pasado di sclavitud den henter comunidad. Esaki ta importante, pero tambe ta nifica un dialogo social di varios aña. Kabinet ta mira den futuro un papel balioso pa e Comite como impulso pa ampliacion y profundisacion di e dialogo aki.
- Ta importante tambe pa nos logra progreso concreto riba e compromisonan, ademas di conduci e dialogo amplio aki. Door di enfoca riba un areglo di subsidio cu lo ta cumpli prome na prinsipio di aña 2024, y un Comite cu por cuminsa traha den zomer di 2024.
- E scope di e fondo, y na momento di funda e Comite lo ta pasado di sclavitud trans-Atlantico. Fundacion di y dunamento di contenido na e Comite lo ser desaroya den cooperacion cu NiNsee, cu tabata e base pa e conmemoracion di 1^e di juli, den di dos mitar di e aña. Den e desaroyo aki, Kabinet y NiNsee ta busca ampliacion cu otro partido social involvi. Den caso di e Comite, e punto di partida ta pa tin un balans den representacion for di tur area cu ta involvi. E encargo di e Comite y demas dunamento di contenido tambe lo ta tema di discusion durante e reunionnan publico cu nos ta organisa di september pa december e aña aki.
- Desaroyo di e medidanan ta tene cuenta cu diferencia di tempo entre e area y comunidad involvi. Di e manera aki, nos ta duna tur hende oportunidad di duna contenido, cautelosamente y di manera adecua na nan deseonan y necesidadnan. Den esaki, nos ta conecta cu experticio y plan existente for di e

comunidadnan aki. Na mes momento, nos ta duna descendiente y otro comunidad involvi espacio pa nan yega na un contenido adecua di nan proposicionnan riba nan propio ritmo.

- E areglo di subsidio pa iniciativa social mester tene cuenta cu e diferencianan di tempo, enfoke y organisacion, y tambe ta trata cu e necesidadnan specifico di diferente comunidad. Asina ta evita cu e grado di organisacion of accesibilidad na fondo existente ta forma un barera pa participacion. Con nos por garantisa esaki lo ta un tema di discusion explicito durante e reunionnan publico cu nos ta organisa di september pa december e aña aki.
- Loke nos siña durante e proceso, nos ta implementa di biaha den practica. Asina Kabinet ta aumenta e subsidionan pa e Aña di Conmemoracion no solamente cu €5,3 miyon, pero tambe Fondo pa Participacion Cultural ta brinda extra guia na Hulanda Europeo y riba tur seis isla den e parti Caribense di Reino. Tambe lo tin un ehempel di aplicacion y un ehempel di presupuesto cu lo por sirbi como modelo pa esnan cu tin menos experencia den haci nan peticion di proyecto. Un parti di e suma aki tambe ta mara pa parti Caribense di Reino. Nos ta considera tambe e areglonan aki durante creacion di e areglo di subsidio di €100 miyon. Esaki mester ser instala di tal manera cu e ta ampliamente aceptabel y di entrada facil. Tambe mester tin un balansa geografico den e gastonan di medio.

Structura proximo trayecto "despues di coma": €200 miyon y Comite

Basa riba e puntonan di salida aki, nos ta yega na e siguiente structura di e proximo proyecto pa contenido di e fondo di €200 miyon y fundacion di e Comite.

Elaboracion di compromiso

Di e fondo di €200 miyon, €100 miyon ta reserva pa realizacion di e medidanan pa conocimiento y conscientisacion, reconocimiento y conmemoracion, impacto y procesamento. Bou di esaki ta inclui en todo caso e compromisonan di e reaccion di Kabinet, manera e areglo di cambio di nomber sin gasto; e investigacion pluri-anual tocante e impacto di pasado di sclavitud; y e aprobacionnan na e islanan tocante patrimonio y maneho di cultura; tambe intensificacion di nos esfuerso riba politica anti-discriminacion y anti-racismo. Parti di e compromisonan aki ta resulta di sigui conseho di e Grupo di Dialogo pa Pasado di Sclavitud, parti ta resulta di peticionnan concreto for di e islanan, pero tambe ta resulta di e realizacion di mocion for di Kamer.

Pa e compromisonan aki ta conta cu nan mester contribui substancialmente na minimo un di e tres metanan: conocimiento y conscientisacion; reconocimiento y conmemoracion; y impacto y procesamento. Tin mester di un balansa geografico den inversion di medio. Tambe, descendiente y otro interesado ta haya un papel activo den e desaroyo mas profundo di e medidanan scogi.

Den e siguiente lunanan nos lo bay den dialogo cu descendiente y otro interesado tocante e manera cu nos por yena e proposicionnan di maneho y compromiso di miho manera. Cu esey nos ta purba crea un proceso, cu lo por duna contenido na intensificacion di maneho di e €100 miyon, den e *najaar* aki. Esaki no ta nifica cu durante e temporada aki nos no lo keda traha riba realizacion di e compromisonan for di reaccion di Kabinet unda ta posibel. Tambe mester tin suficiente atencion pa

diferencia den tempo den desaroyo di e copromisonan. Nos lo informa bo Kamer tocante e desaroyo den e *voortgangsbrief* fin di e aña aki.

Elaboracion di e areglo di subsidio di €100 miyon, y Comite

Pa duna contenido na e areglo di subsidio pa iniciativa social (e otro €100 miyon) y fundacion di e Comite, nos ta tuma e siguiente pasonan:

Fase di orientacion: januari - juni 2023

Kabinet a tuma parti den discusion for di inicio di 2023 te cu awe pa obtene mas comprendemento tocante nificacion di disculpa y pa comprende e condicionnan pa e proceso despues di e coma. E informacion reuni di e discusionnan aki, hunto cu e compromisonan di reaccion di kabinet, ta randvoorwaarde pa duna contenido na e siguiente fase di e trayecto. Dia 15 di juni di e aña aki, nos a test e condicionnan aki cu un grupo amplio di descendiente y otro partido involvi. Punto di atencion cu nan a trece dilanti a forma parti di e proposicion aki.

Fase di preparacion: zomer 2023

Trabou di preparacion di ambtenaar di rango halto pa e encuentronan social na Hulanda, riba e islanan y consulta continuo door di Speciaal Gezant Slavernijverleden in Suriname.

Fase di encuentro: augustus - oktober 2023

Organisacion di reunion social den henter Reino. Pa esaki, na Hulanda Europeo ta organisa reunion publico den henter pais. Na e parti Caribense di Reino nos ta organisa, mescos cu fin di aña pasa, un 'sesion di Catshuis Caribense' pa hiba un discusion conhunto cu e islanan tocante e desaroyo ulterior di e compromisonan. Tambe nos ta organisa reunion di participacion riba e islanan, caminda e forma specifico ta keda adapta na cada isla. Meta di tur e encuentronan aki ta pa bay den dialogo cu descendiente y organisacion interesa tocante nan vision, entre otro, tocante:

- o Meta, criterio, y organisacion di e areglo di subsidio
- o Meta, perfil, y organisacion di e Comite desea

Durante e encuentronan aki nos ta bay den combersacion tambe cu organisacionnan Grass roots, kende nan experencia y conocimiento ta esencial pa e siguiente fase. Nan ta e organisacionnan y iniciativa cu ta traha den e comunidadnan diariamente pa bay contra e impacto di pasado di sclavitud. Tambe nos ta inclui activamente hobennan, pasobra e combersacionnan aki ta trata tocante nan futuro y nos no kier papia over nan, pero cu nan mes. Nos ta invita representante di comunidad Indigena y Marron. Nos ta inclui nan explicitamente den e siguiente fase. Pa asina nan historia y heroenan tambe bira parti di nos pasado comun, y pa asina tin mas atencion pa nan deseonan specifico tocante procesamento y sanacion. Meta di e encuentronan ta pa duna e grupo aki e oportunidad pa duna nan aporte riba e medidanan cu lo keda desaroya y pa stimula e conexion entre e gruponan mes. Pa conscientemente traha hunto na e proximo proceso.

Na Suriname lo tin un trayecto separa. Consulta cu descendiente y otro interesado a tuma luga caba y lo continua. Unda ta necesario, lo tin tambe

consulta cu persona y grupo adicional. Na e momento aki ta di importancia pa continua cu e consultanan y e dialogo tocante vision di descendiente y organisacion interesa rond di e arreglo di subsidio.

Pa loke ta trata e comite di conmemoracion planea y e conmemoracion den henter Reino, basa riba e consulta adicional, lo mira con ta posibel pa haci esaki den cooperacion cu Suriname.

Fase di procesamento: october - december 2023

Despues di e fase di encuentro amplio, mester saca conclusion. E conclusionnan ey mester wordo saca door di e tres spoornan conhuntamente. Cu wowo riba un proceso cauteloso pero tambe efectivo, ta deseabel cu esaki tuma luga den un setting mas chikito.

Como estructura di consulta, lo instala dos grupo di trabou ambtenaar-social (temporal), un pa e Comite, y un pa e arreglo. Pa contenido di e gruponan di trabou aki, e punto di salida ta un distribucion balansa di representante-ambtenaar y organisacion social for di tur tres direccion: for di Hulanda, e islanan, y unda posibel cu participacion di Suriname. Ademas di un representacion igual, punto di salida ta cu e miembronan premira di e dos gruponan di trabou aki tin experiencia specifico den area di fondo, gobernacion publico, of conmemoracion; involucramento probabel den e topico; y por conta cu un apoyo amplio den comunidad. Den esaki nos ta trata na logra un balans entre diferente grupo di edad. E gruponan di trabou ta instala oficialmente door di ministerio di Asunto Interior y Relacion di Reino, den consulta cu e sobra departamentonan. Den e fase aki, Reino ta hunga un papel di facilitador y sostenedor.

E gruponan di trabou lo ta bou di guia di un guia di proceso independiente y tin como encargo pa colecta y interpreta e conclusion y hayazgonan for di Fase di Encuentro. Despues nan ta ser suspende. E hayazgo y conclusionnan di ambos grupo di trabou lo wordo parti den dos sesion specifico (un pa e Comite, un pa e arreglo di subsidio) na november y december, y lo wordo presenta y entrega atrobe na e publico mas amplio. Asina nos ta duna continuacion na e sesionnan amplio di Catshuis y e encuentro di 15 di juni di e aña aki. Nos lo comparti e resultadonan di esaki cu Tweede Kamer.

Fase di decision y organisacion: principio - voorjaar 2024

Basa riba e conclusionnan di e reunionnan y e hayazgonan di e grupo di trabou, nos ta sigui duna forma na e proceso. E contenido specifico di e trayecto di tumamento di decision ta depende parcialmente di e input cu sali for di e fasenan aki.

Sinembargo, ta conta como 'punto di horizon' cu e arreglo pa subsidio ta activo no mas tarda na principio di aña 2024, of mas trempan, y cu e Comite mester ta operacional na juli 2024 segun planificacion. Ta importante pa menciona cu e posibilidad di logra e fecha aki ta depende di e dialogonan cu nos lo tin e

najaar aki. Aki atencion ta primordial. Descendiente ta involvi den duna contenido despues y formalisacion di e areglo y e Comité.

Nos lo informa Kamber den voorjaar 2024 tocante e proceduranan scogi relaciona cu e contenido di e areglo di subsidio y e Comité di Conmemoracion.

Progreso compromiso reaccion di kabinet 19 december

Entre tanto, bou di coordinacion di e minister di BZK, Kabinet ta traha tambe pa desaroyo rapido di e compromisonan cu a ser menciona den reaccion di Kabinet. Nos ta agrega enfatizando cu e progreso ta relaciona specialmente cu resto di e aña aki y 2024. Sinembargo, e esfuerso di Kabinet no ta termina despues di Aña di Conmemoracion. Na final, ta trata di construccion di un dialogo structural tocante nos historia comun y di tuma paso hunto pa mihora conocimiento y conscientisacion den comunidad, di conmemora hunto y di combati hunto e impacto di pasado di sclavitud. Den e parti aki di e carta, nos ta informa bo tocante e progreso di e siguiente dossiernan:

- Compromiso parti Caribense di Reino
- Suriname
- Areglo di cambio di nomber sin gasto
- Enseñansa
- Aña di Conmemoracion di Pasado di Sclavitud
- Museo Nacional di Pasado di Sclavitud
- Politica contra discriminacion y racismo

Parti Caribense di Reino

Na mes tempo di e disculpanan dia 19 di december aña pasa, tabata tin representante presente na e seis islanan di e parti Caribense di Reino.³ Despues di e discurso di e prome minister, a trata pasado di sclavitud y e impacto cu esaki tin riba cada isla.⁴ Adicional riba e medidanan cu a anuncia den e reaccion di Kabinet dia 19 di december di aña pasa, a haci un cantidad di compromiso pa cada isla. Esakinan a resulta for di e aporte cu e islanan a duna na e rapport "Ketenen van het verleden" y e discusionnan cu a tuma luga basa riba esaki. Tambe, pa realizacion di e compromisonan aki y e establecimiento di e medidanan for di e reaccion di Kabinet, manera e areglo pa iniciativa social y e Comité, ta keda stipula cu esaki ta sosode den colaboracion cu gobierno di e paisnan, bestuurscollege di tur entidad publico, organizacion social y descendiente. Manera a indica den reaccion di Kabinet, e meta ta pa e compromisonan pa e islanan wordo financia for di e suma di €100 miyon pa medida cu ta relaciona cu conocimiento y conscientisacion, reconocimiento y conmemoracion, y impacto y procesamento.⁵ Realizacion di e compromisonan aki ta forma parti di un discusion

³ Secretario di estado di HuS na Aruba, Secretario di estado di AIR na Curaçao, minister di SZW na Bonaire, minister di VWS na Sint Maarten, Secretario di estado di Finansa na Sint Eustatius y Secretario di estado di VWS op Saba.

⁴ Referencia na e cartanan pa Staten di Aruba, Curaçao y Sint Maarten y y Eilandsraad di Bonaire, Sint Eustatius y Saba.

⁵ Di e suma di €100 miyon, tambe ta financia e siguiente medidanan: reglamento di cambio di nomber sin gasto; investigacion pluriañual tocante e impacto di pasado di sclavitud; mescos tambe intensificacion di esfuerso pa combati discriminacion y racismo.

mas amplio cu e parti Caribense di Reino tocante duna contenido despues na henter e pakete, y nan necesidadnan specifico den esaki.

For di december a tuma luga encuentro digital y fisico na tur isla cu representante di gobierno, organizacion social y descendiente. Ta di suma importancia cu e islanan tin e direccion den cumplimiento di e disculpa. P'esey nan a indica te na ki punto e compromisonan por ser concretisa y ehecuta. Tambe ta conta cu pa algun compromiso ainda tin mester di mas investigacion y deliberacion riba e isla, por ehempel pa medio di participacion of pa medio di e trabou di un comision di conseho. Ehecucion di e compromisonan y yegada na un punto di bista tin su propio forma y ritmo pa cada isla. Pa esaki, Kabinet ta investiga con por brinda apoyo na diferente organizacion den nan trabou, cu atencion special pa organizacionnan grass roots y participacion comunitario. Pa esaki, Kabinet ta organisa un encuentro den area Caribense despues di zomer, unda tur stakeholder interesa di e seis islanan lo ser invita. Esaki ta continuacion di e encuentro cu a tuma luga na Curaçao dia 23 di november aña pasa.

Riba 13 di april, e aña aki, secretario di Estado di Asuntonan Interior y Reino (BZK) a compromete pa informa bo Kamber tocante e dialogonan cu e islanan tocante elaboracion di reaccion di Kabinet tocante pasado di sclavitud.⁶ Den e carta aki nos ta duna informacion pa cada isla tocante e progreso y resultado di e dialogonan y realizacion di e mocionnan te cu awor. Cu esaki, Kabinet ta considera e compromiso di e secretario di Estado completa.

Aruba

Riba 19 di december minister-president di Aruba a anuncia cu gobierno a instala un grupo di trabou. E comite 'Conscientisacion di pasado di sclavitud di Aruba' a cuminsa cu un campaña di conscientisacion y ta sirbi como e partner principal den cumplimiento di e disculpa. E comite ta consisti entre otro di representante di mundo cientifico, organizacion manera Archivo Nacional di Aruba y sector di cultura.

Archivo Nacional di Aruba ta traha haciendo e Archivonan Colonial investigabel cu ayudo di software di reconocimiento di manuscrito. Esaki ta duna un aporte importante na aumenta e accesibilidad di e informacion di e archivonan y ta brinda oportunidad pa busca informacion tocante hende haci catibo mas eficiente y efectivo. E compromiso ta pa cubri e medidanan aki, cu ta forma parti di e compromisonan di reaccion di Kabinet, cu e €100 milyon cu e Kabinet a reserva pa esaki.

Necesidad pa mas educacion y metodo di enseñansa tocante pasado di sclavitud di Aruba a hiba na e compromiso pa percura un reimprenta tanto di e buki *Educacion Herencia di Sclavitud* como di e buki *Slaven zonder Plantage*. E bukinan aki ta pa uzo den enseñansa y lo wordo actualisa, traduci na Papiamentu y poni na disposicion di scol. Ademas, ta trahando pa crea un imagen na honor di e heroina di resistencia Virginia Dementricia. E comite ta den dialogo cu un artista y cu gobierno di Aruba tocante un luga adecua. Basa riba e diferente dialogonan, e

⁶ TZ202304-157, d.d. 13 april 2024.

grupo di trabou ta trahando riba un plan mas amplio pa sigui e compromisonan di disculpa. Apesar di e progreso aki, a pone atencion na algun punto pa sigui e disculpa den un carta di minister di Finansa y Cultura, bou di cual e fondonan disponibel y e museo nacional di sclavitud. E puntonan di atencion aki a wordo tuma en cuenta.

Curaçao

Den e *Plataforma Sklabitut i Herensha di Sklabitut* tin representante di diferente organisacion no-gubernamental na Curaçao cu ta enfoca riba pasado di sclavitud. Nan a duna forma na e conseho pa e rapport 'Ketenen van het verleden' y awe nan ta involvi hunto cu Ministerio di Enseñansa, Cultura, Ciencia y Deporte di Curaçao den cumplimiento di e disculpa.

Rehabilitacion di e heroe di resistencia Tula ta un deseo pa hopi tempo conserva na Curaçao y tabata un recomendacion explicito den e rapport 'Ketenen van het verleden'. E compromiso cu gobierno Hulandes lo rehabilita Tula por a wordo lesa den reaccion di Kabinet, despues cu esaki a ser anuncia pa e secretario di estado di BZK. Rehabilitacion lo tuma luga riba 3 di october di e aña aki, riba dia di fayecimento di Tula, na Curaçao.

Rehabilitacion di Tula ta representa e simbolo di e plataforma pa un movimiento di emancipacion. E plataforma a desaroya un amplio programa pa duna continuacion na e compromiso rond di 3 di october. Financiamiento di e programa aki a wordo otorga na e plataforma.

Bonaire

Na Boneiro, grupo di trabou 1e di juli a ricibi e encargo pa engrandece consciencia di pasado di sclavitud di Boneiro. E grupo di trabou a haci tambe un cantidad di recomendacion tocante continuacion di e disculpa. Ademá, Dialooggroep Bonaire, na nomber di e isla, a contribui na e rapport di Colegio di Conseho. Siguiendo nan conseho, Kabinet a compromete pa realizacion di un monumento di (fam) pa pasado di sclavitud. E compromiso aki ta forma parti di e compromisonan y medidanan di maneho di conocimiento y conscientisacion, reconocimiento y conmemoracion, y impacto y procesacion, pa cual e Kabinet a pone na disposicion €100 milyon. Dialooggroep Bonaire ta trahando riba identificacion di investigacion extra di fam necesario, e diferente ideanan tocante e forma, y ta den dialogo cu Bestuurscollege tocante e localidad unda e monumento lo keda instala.

Recientemente, reedicion di e buki *Bonaire, een koloniale zoutgeschiedenis* a ser presenta na secretario di Asunto Interno y Relacion di Reino. Disponibilidad di e buki aki, den conexion cu e material di les na e scolnan na Bonaire, ta di esencial importancia pa aumenta conscientisacion tocante pasado di sclavitud y pasado colonial.

Na e momento aki, grupo di trabou 1^e di juli, den colaboracion cu Dialooggroep Bonaire y e plataforma di ONG na Bonaire ta trahando riba desaroyo di un plan mas amplio pa cumpli cu e disculpa.

Sint Maarten

Na februari 2023, minister-president di Sint Maarten a instala oficialmente *Advisory Committee on Slavery, Atonement and Reparations*. E comision ta consisti di nuebe miembro cu diverso background y experticio den educacion, ciencia, spiritualidad, sector hudicial, cultural y medico. E comite tin como encargo pa yuda gobierno di Sint Maarten cu conseho tocante cumplimiento di e disculpa, entre otro basa riba un dialogo social. Prome, e comision lo realiza un investigacion tocante pasado colonial y pasado di sclavitud den contexto di Sint Maarten y con esaki ta afecta e comunidad actual. Despues nan lo presenta un conseho incluyendo recomendacion. E Kabinet ta enfatisa cu ta importante pa Sint Maarten sigui e proceso aki den su propio tempo, despues di cual nan kier duna forma na cumplimiento di e disculpa.

Sint Eustatius

Na Sint Eustatius, Kabinet a haci compromiso pa financia un monumento of luga di conmemoracion di sclavitud y pa yuda financieramente y tecnicamente e trabou di *Sint Eustatius Cultural Heritage Implementation Committee* basa riba e necesidadnan. Den e periodo pasa, a discuti varios idea pa e dos compromisonan, manera un monumento pa tur Africano cu a wordo haci catibo y deramento di nobo di antepasado cu ta dera na Sint Eustatius. Na mes momento, representante di descendiente, organizacion social y cuerpo publico ta traha riba un plan cu ta contene e necesidad pa ehecuion di e compromisonan. E medida aki ta forma parti di e compromisonan for di reaccion di Kabinet caminda e Kabinet a reserva €100 miyon. Ehecuion di e compromisonan mester wordo mira den un proceso mas amplio di conscientisacion di pasado di sclavitud y pasado colonial. A tene diferente discusion tocante decolonialisacion den diferente aspecto di comunidad. Pa contribui na conscientisacion, tin diferente medio manera desaroyo adicional di material di les cu ta trata pasado di sclavitud na Sint Eustatius, facilidad di un dialogo social y proyecto di Oral History.

Saba

Na Saba a tuma luga diferente dialogo cu representante di descendiente, organizacion social y cuerpo publico. For di esaki a sali diferente idea tocante realizacion di e compromisonan pa un monumento y pa pone riba mapa posibilidad y apoyo di investigacion genealogico pa descendiente. Realizacion di e compromisonan aki ta keda den un enfoque mas amplio di conscientisacion tocante pasado di sclavitud y pasado colonial, por ehempel door di facilita un dialogo social, organizacion di proyecto di Oral History, desaroyo di material di les tocante pasado di sclavitud di Saba y marca 1^e di juli como dia liber oficial na e isla. E diferente ideanan aki ta wordo desaroya awor en cooperacion cu OLS y organizacion social.

Durante e debate di Kamer tocante reaccion di Kabinet riba 25 di januari di e aña aki, a aproba e mocion-Simons c.s. E mocion ey a pidi gobierno pa facilita tambe e buskeda di unda exactamente nos ta bini, door di realiza investigacion di DNA pa institutonan sin meta di ganashi, manera Erasmus Universiteit. Finalidad di e mocion ta acopla na e compromiso cu Kabinet a haci na Saba riba 19 di december. Procesamento di e compromiso ey por sirbi como pilot pa e iniciativa aki.

Tema general

Durante e rondanan di combersacion riba e islanan, diferente topico ta bin dilanti repetidamente, manera preservacion, maneho y accesibilidad di herencia colonial y di sclavitud; accesibilidad di e fondonan di cultura di Reino riba e islanan; e infraestructura cultural disponibel; y e instalacionnan di museo. E diferente ideanan aki ta keda inclui den nan propio plan pa cada isla. Ademá, Ministerio di OCW ta analisa na ki manera por brinda sosten, por ehempel door di conecta cu maneho di iniciativa existente manera e convenio di Cultura, pero tambe door di cooperacion cu Archivo Nacional y Biblioteca Real na Den Haag.

Suriname

Pa duna forma na e proceso cu Suriname na un manera cauteloso y pa percura cu e ta haya e atencion cu e merece, Ministerio di Relacionan Externo (BZ) a instala un Speciaal Gezant Slavernijverleden. E Speciaal Gezant a bay den combersacion cu un variedad amplio di representante y interesado na Suriname, den colaboracion estrecho cu embahada Hulandes na Paramaribo. For di su nombramento na maart, e Speciaal Gezant Slavernijverleden a bishita Suriname tres biaha. For di e combersacionnan aki ta resulta cu e topico, manera den Reino Hulandes, ta genera hopi reaccion y ta existi diferente perspectiva.

Den e combersacionnan aki, a duna atencion special na e perspectivanan di e Comunidad Indígena y Comunidad Marron. Ta trece nan explicitamente den e proximo trayecto. Den e combersacionnan cu e comunidadnan aki, ta resulta cu tin ainda paso cu mester tuma riba tereno di sanacion, caminda ritual ta hunga un papel importante y unda tempo ta necesario. Tambe ta pidi atencion pa e posicion di atraso cu e comunidadnan aki ta enfrenta.

Den e contexto di bon relacion bilateral, Speciaal Gezant Slavernijverleden tambe ta mantene consulta cu gobierno di Suriname. Asina, nan ta discuti entre otro cu e Coordinador Nacional nobo, ex-minister Silvano Tjong-Ahin, con gobierno di Suriname ta desea di duna forma na e enfoque integral y holístico desea y con e compromiso di Hulanda por conecta cu esaki.

Na Suriname tin un campo diverso di grupo di interes. Den e tempo cu ta bini lo continua e dialogo na Suriname pa inclui mas tanto perspectiva posibel y por papia cu representantenan. Dia 1^e di juli, minister di Relacion Externo, na nomber di gobierno Hulandes y riba invitacion di gobierno di Suriname, lo ta presente na e conmemoracion na Suriname.

Mientras e dialogo cu y na Suriname ta para central, Speciaal Gezant Slavernijverleden a tene discusion tambe na Hulanda, pa motibo di e contexto mas amplio y interconexion social entre comunidad di Suriname y Hulanda.

Enseñansa

Bou di guia di minister di Enseñansa Primario y Secundario, lo cuminsa mas pronto posibel cu formulacion di meta nucleo pa enseñansa primario y parti básico di enseñansa secundario, manera ciudadanía, historia y pasado colonial. Den e encargo pa formulacion di e metanan aki, ta stipula explicitamente cu mester

includi proposicion tocante con racismo, discriminacion, antisemitismo, pasado colonial y historia di migracion ta ser integra solidamente den e curiculo. Pa cuminsa, basa riba e metanan pa enseñansa primario y parti basico di enseñansa secundario, ta trahando cu programa di examen, cual lo ser revisa mas despues den cuadro di revision di henter curiculo. Prome cu zomer lo busca maestro y otro profesional di enseñansa. Nan lo cuminsa despues di zomer cu como meta entrega di concepto di e metanan nucleo rond di zomer di 2024.

Un di e ambicionnan for di e plan di OCW contra discriminacion y racismo ta cu OCW ta busca un oferta inclusivo den tur su areanan. Pa esaki ta importante cu tin un presentacion amplio di historia den enseñansa, cu atencion pa discriminacion, racismo, exclusion, inclusion y igualdad. OCW ta explorando con por duna forma na esaki, door di entre otro pasado di sclavitud. Den esaki, siguramente e mocion di miembro Simons tocante ancramento di e storianan di luchador pa libertad contra colonialismo y heroe di resistencia lo ta tuma na cuenta den enseñansa.⁷ Mas tarda den najaar di 2023, Kabinet lo informa Kamber tocante e estado di e realizacion di e mocion aki.

Banda di esey Kabinet ta haci esfuerso pa reforsa seguridad social di alumno y estudiante. Tratamiento di discriminacion y racismo ta un parti importante di esaki.

Por ultimo, ministro di Enseñansa, Cultura y Ciencia ta traha riba e mocion di miembro Belhaj c.s.⁸ Den e mocion aki, ta pidi gobierno pa explora hunto cu Suriname con por adapta miho e maneho di enseñansa pa hobennan Surinameo cu ta desea di studia na Hulanda y pa yuda e hubentud cu no tin e posibilidad financiero pa logra esaki.

Atualmente, Stichting SUConnect.nl y Hogeschool Rotterdam ta realizando un investigacion pa mira ki problema estudiante Surinameo cu ta na Hulanda ta enfrenta, cuanto nan ta y unda e problemanan mas grandi ta. Tambe, e fundacion aki ta yuda estudiante Surinameo cu nan propio red pa haya un stage of trabou na Suriname of Hulanda, si tin un necesidad pa esaki. Basa riba e resultadonan di e investigacion di SUConnect, pa cual OCW a facilita un subsidio, por bay den dialogo cu instituto di enseñansa pa explora con por elimina obstaculo cu ta percura pa un exito abou di estudio.

Finalmente, riba 13 di juni, minister di Enseñansa, Cultura y Ciencia y minister di Enseñansa Primario y Secundario a firma un Memorandum of Understanding (MoU) cu minister di Enseñansa, Ciencia y Cultura di Suriname. Den esaki ta keda registra con y cu cua prioridad e dos paisnan lo traha hunto riba enseñansa durante e proximo dos añanan. E MoU ta contene cuater tema cu ta ser desaroya pa medio di un agenda di enseñansa comun. E temanan ta 1) reforsa ley y cuadro huridico riba enseñansa na Suriname; 2) fortifica politica y capacidad institucional di Suriname; 3) fortifica enseñansa fundamental na Suriname y 4) miho conexion cu mercado laboral y mantencion di talento (academico) na Suriname. Hulanda lo contribui, unda Suriname tin necesidad, cu conocimiento y habilidad cu nos tin pa fortifica calidad di enseñansa. E esfuerso ta pa logra cu den colaboracion riba enseñansa, ta wak manera pa crea oportunidad pa hoben Surinameo desaroya nan talento, pone nan conocimiento y habilidad den nan propio pais y tambe

⁷ Kamerstukken, Vergaderjaar 2022-2023, 36200 VIII, nr 142.

⁸ Motie Belhaj 36284-5.

motiva maestro pa keda motiva den nan propio pais. Ki accion concreto por keda tuma pa logra esaki, nos lo sigui explora cu Suriname.

Areglo pa cambio di fam sin gasto

Ministerio di Husticia y Seguridad (despues: HS) actualmente ta trahando riba un areglo temporal pa cambio di fam sin gasto pa descendiente di hende haci catibo, pa por adelanta un eventual areglo structural. Den cuadro di sigui duna forma na e areglo aki un combersacion a tuma lugar cu un cantidad di organizacion di interes riba 12 di april ultimo. Den e cuadro aki a palabra pa tene reunion regularmente tocante e progreso di e areglo - tanto prome como despues cu e drenta na vigor. A base di e responsabilidad conhunto aki, nos por evalua kico ta e nesecidadnan di e descendientenan, por pone eventual obstaculo pa loke ta trata maneho/ ehecucion riba mesa, y lo wak cu cua punto ta confronta despues cu e areglo drenta na vigor.

E areglo temporal conoce inicialmente un periodo di duracion di 5 año, den cua lo evalua e areglo despues di 3 año, y tambe ta wak si por tuma decision tocante un areglo cu caracter permanente. E medida aki ta forma parti di e compromisonan di reaccion di Kabinet, cu ta financia for di e €100 mion cu Kabinet a reserva pa esaki. Den e areglo aki, lo introduci un fundeshi nobo den e Decreto di Cambio di Number (Besluit Geslachtsnaamswijziging) pa number cu ta relaciona cu pasado di sclavitud. E areglo tin tres punto di salida, esun cu e areglo mester:

- a) keda lo menos posibel un carga pa aplicante - esaki ta nifica cu no tin un carga pisa di prueba y no tin mester di un declaracion di un especialista referiendo por ehempel na molester psikico experencia;
- b) haci lo menos diferencia posibel basa riba origen di number. Persona cu background di migracion for di antiguo colonia unda a tene solamente un registracion di number hopi cortico, en principio no mester carga un carga di prueba mas pisa cu persona cu background di migracion for di antiguo colonia unda registracion di number tabata mas completo.
- c) ta implementa di manera realisabel pa Servicio di Husticia, esaki ta nifica cu ta haci un control di implementacion prome.

Ta purba pa laga e areglo drenta vigor durante Año di Conmemoracion. Ta spera cu e decision ta publica den Staatsblad na principio di 2024 y poco despues drenta na vigor.

Bou di e areglo aki, lo elimina diferente barera cu ta experencia den e area actual pa cambio di number relaciona cu pasado di sclavitud.

E prome barera cu ta elimina ta e gastonan financiero cu ta bay cu un peticion di cambio di number di €835. Cambio di number lo no costa nada pa descendiente di hende cu a ser haci catibo.

Un di dos barera cu ta elimina, ta e obligacion pa presenta prueba di daño serio fisico of mental door di un psicologo bevoegd. Den e areglo di cambio di number gratuito pa descendiente di hende cu a ser haci catibo, aplicante lo mustra mediante di un declaracion propio cu nan number ta bini for di pasado di sclavitud.

Tambe, ora di selecciona un number nobo di famia, ta elimina e rekisito cu e number mester zona Hulandes.

Aña di Conmemoracion di Pasado di Sclavitud

Den e reaccion di Kabinet, bo por lesa cu Kabinet ta sostene iniciativa social den Aña di Conmemoracion di Pasado di Sclavitud, tanto den Reino como pafo di Reino. Pa esaki, na final di aña pasa, a establece dos areglo di subsidio cu cada un, un total di €1 miyon na Mondriaan Fonds y Fonds voor Cultuurparticipatie, pa dentro di Reino. Tambe ta premira un areglo internacional cu ta actualmente den desaroyo di €0,8 miyon, pa iniciativa na e paisnan cu tin un relacion cu pasado di sclavitud Hulandes.

Na comienso di e aña aki, a resulta cu tabatin hopi interes den Mondriaan Fonds y Fonds voor Cultuurparticipatie pa organisa actividad cultural, social y educativo.

Pasobra Kabinet ta duna importancia grandi na e movimiento social amplio aki, y pa realisa mas tanto bon iniciativa impactante posibel, Kabinet a dicidi pa aumenta e areglo di Aña di Conmemoracion cu €5.3 miyon incidentalmente. Cu ne ta haci lo siguiente:

1. E areglo di Mondriaan Fonds ta keda aumenta cu €2 miyon. Cu e fondonan aki, lo por honra mas solicitud cu a ricibi.
2. E regla di Fonds voor Cultuurparticipatie ta keda aumenta cu €2 miyon. Di esaki, un porcion ta reserva specificamente pa Aruba, Bonaire, Curaçao, Saba, Sint Eustatius y Sint Maarten. Ademá, lo tuma medida extra pa facilita accesibilidad na Hulanda Europeo y e parti Caribense di Reino.
3. E suma disponibel pa e areglo internacional ta keda aumenta te cu €1.6 miyon. E manera con e medianan aki ta bira obtenibel ta den desaroyo na e momento aki.

Asina por tin mas proyecto cu por enriquece Aña di Conmemoracion. Ta importante pa menciona cu Kabinet ta haci e medianan aki disponibel via e nota di voorjaar. Pues esaki ta nifica cu nan no ta bin di e fondo di €200 miyon.

Museo Nacional di Pasado di Sclavitud

Na Amsterdam ta realisa un museo Nacional di Pasado di Sclavitud. Den e museo aki, e generacionnan actual y esnan futuro por adkeri conocimiento tocante nos pasado colonial di sclavitud, cu e punto di salida sclavitud trans-Atlantico y tambe cu atencion pa e sclavitud den Indisch-Oceanië. E museo lo bira un luga cu ta brinda descendiente di catibo un espacio pa conmemoracion y reflexion. E museo lo desaroya, stimula, colecta y expone conocimiento tocante nos pasado colonial di sclavitud. Ademá, e museo lo bira un luga caminda ta stimula dialogo tocante nos pasado comun y su impacto actual.

E Museo Nacional di Sclavitud lo bira un museo pa henter Reino, cu ta conta e storia di henter reino y ta traha den colaboracion cu hende y organisacion den henter reino. For di 2017 ta traha caba na desaroyo di e museo aki, como encargo di parti di Gemeente Amsterdam. Reino ta involvi den realizacion y financiamiento di e museo aki desde 2019.

Den e fase actual tres intendente na Gemeente Amsterdam ta traha riba un businessplan pa museo, un proposicion pa programacion temporal y un proposicion pa un localidad. E intendentenan ta entrega e productonan aki na fin di 2023 na Amsterdamse wethouder van cultuur, despues di esaki lo sigui un decision di colegio. Ministerio di OCW ta involvi di manera intensivo den e formacion di decision aki. E proposicion ta keda realiza danki na un trayecto di participacion den henter Reino. Pa pone esaki den practica, e intendentenan a bishita e seis islanan y Suriname na januari 2023.

Ta importante pa menciona tambe cu e contribucion na e museo ta bini for di e presupuesto di cultura di Ministerio di OCW. E medianan aki no ta bin riba gasto di e fondo di €200 miyon.

Impacto local di Museo Nacional di Sclavitud

Na mes tempo, Kabinet a haci un compromiso na tur seis isla cu e museo di sclavitud lo tin un impacto local. Organizacion di e impacto local di e museo aki den Caribe den forma di instalacion di museo, herencia y archivo lo tuma luga paralelo cu esaki. Medio necesario pa esaki ta tema di discusion, pero nan no lo bini riba gasto di e presupuesto di e museo di sclavitud na Amsterdam. Den e periodo cu ta bini, Kabinet lo sigui den dialogo cu e islanan tocante e formacion di e trayecto aki. Particularmente pasobra nos ta desea di cumpli mas tanto posibel cu e necesidadnan di Caribe y no subordina nan na e museo di Hulanda-Europeo.

Durante e debate tocante e reaccion di Kabinet dia 25 di januari pasa, a acepta e mocion Leijten tocante responsabilidad di conservacion di herencia material y imaterial di historia di sclavitud y colonial den antiguo teritorio colonial y e mocion Klaver tocante refuerzo di instalacion di museo den e parti Caribense di Reino y Suriname.⁹ Contenido di ambos mocion y e tematicanan specifico pa cada isla ta forma parti integral di e dialogonan tocante continuacion di e disculpanan.

Oportunidad igual y anti-racismo y politica anti-racismo

Den reaccion di Kabinet di 19 di december, nos a indica tambe cu Kabinet ta intensifica su esfuerzo pa combati discriminacion y racismo. Nos ta haci esaki, entre otro, pa medio di e programa nacional contra discriminacion y racismo, cu a keda desaroya bou guia di e Coordinador Nacional contra Discriminacion y Racismo. E programa a keda publica na september 2022¹⁰ y lo ser actualisa na november 2023. E programa ta cubri henter comunidad, pasobra combati discriminacion ta un encargo pa tur hende: civil, empleado, empresa, organisacion social y gobierno mes.

Pa trata discriminacion riba mercado laboral, ministerio di Asunto Social y Laboral (SZW), ta traha riba diferente actividad pa combati discriminacion durante seleccion y na pia di trabou, y pa stimula igualdad di oportunidad pa medio di Actieplan Arbeidsmarktdiscriminatie 2022-2025 y Werkagenda Verdere Inclusie op de Arbeidsmarkt (VIA). E proposicion di ley pa *supervicion di igualdad di*

⁹ Motie Leijten 36284-20 en motie Klaver 36284-13.

¹⁰ [Nationaal Programma tegen Discriminatie en Racisme 2022 | Rapport | Rijksoverheid.nl](#)

oportunidad durante seleccion ta forma parti di esaki. E proposicion di ley aki, cu recientemente Kamber a acepta, ta obliga dunador di trabou dispone di un metodo pa recluta y seleccion cu ta enfoca riba evita discriminacion. Tambe ta traha riba sosten pa dunador di trabou pa medio di, entre otro, habrimento di helpdesk di Diversidad den Negoshi, desaroyo di un e-learning enfoca riba reclutamento y seleccion obhetivo y instalacion di communities of practice y branche y red regional di organisacion di dunador di trabou.

Ministerio di SZW ta enfoca, banda di discriminacion riba mercado di trabou, specificamente riba combati discriminacion basa riba origen, color y religion, incluso racismo anti-color scur. Asina a haci investigacion tocante background, causa y factor cu por hiba persona di origen Africano den situacion di discriminacion y tambe a haci investigacion tocante facilidad di papia tocante discriminacion den nan propio circulo. E investigacionnan aki ta ofrece medio pa preveni discriminacion anti-color scur.

Ministerio di OCW ta traha, pa medio di stagepact MBO 2023-2027 y e manifesto contra discriminacion den stage den enseñansa superior, pa combati discriminacion na stage den enseñansa mas avansa. Ta trata aki di tur forma di trato diferente, exclusion of pone den desbentaha basa riba característica (personal).

Medio antidiscriminacion

Tambe, Kabinet ta haci medio pa reforma y amplia e servicio contra discriminacion disponibel. Pa esaki, Kabinet ta pone anualmente €2,5 miyon disponibel via e decision tuma den voorjaar. E medionan aki no ta sali for di e suma di €200 miyon pa pasado di sclavitud.

Un punto importante di intensificacion den area di politica anti-discriminacion y anti-racismo ta fortificacion di facilidad di anti-discriminacion (FAD). Hende cu ta sinti nan discrimina por haci melding di discriminacion y nan por yega aya pa conseho y asistencia na e instancianan aki. Esaki ta un elemento importante den trata discriminacion. Na e momento aki, no tur FAD ta cumpli cu e exigencianan poni pa nan. Riba encargo di Ministerio di Asunto Interno y Relacion di Reino (BZK), departamento di investigacion Berenschot a mapea cuater escenario pa fortifica e facilidadnan di anti-discriminacion riba e aspectonan aki. E investigacion a wordo manda Kamber dia 31 di maart 2023.¹¹

Nos ta reconoce e importancia di FAD cu tin un posicion fuerte, conocimiento amplio y cu por wordo uza ampliamente na diferente manera; un instancia caminda hende no solamente por bay pa conseho y asistencia, pero tambe pa un orea pa scucha, un partner di cooperacion pa polis y O.M. (Openbaar Ministerie) den e consultanan regional di discriminacion, un interlocutor pa gemeente, organisacion social y empresa den nan region y tambe cu por duna nan training y conseho. Pa esaki, di tur manera ta necesario cu e FADnan haya un tarea di prevencion, y cu financiamiento di e FADnan ta yena di un manera diferente.

¹¹ [Kamerbrief over rapport Inrichting, takenpakket en financiering ADV's | Kamerstuk | Rijksverheid.nl](https://www.rijksoverheid.nl/onderwerpen/antidiscriminatie/rapporten/kamerbrief-over-rapport-inrichting-takenpakket-en-financiering-adv's-1-kamerstuk-1-rijksverheid-nl)

Resultado di e rapport di Berenschot lo ta uza como punto di salida pa e trayecto despues pa logra un situacion caminda e FAD-nan por funciona como organizacion central den tratamiento local y regional di discriminacion. Den e trayecto aki, tur partido relevante lo ta inclui.

Logra e meta aki lo ta un plan di varios aña. Entretanto, ta importante pa fortifica e FAD-nan na medida cu ta posibel. Pa esaki, Ministerio di Asunto Interno y Relacionnan di Reino lo cuminsa cu expansion di e encargonan di e FAD-nan cu un encargo di prevencion. Pa esaki, Kabinet a asigna medio adicional na BZK via *voorjaarsnota*. E medionan aki ta separa di e €200 milyon pa pasado di sclavitud. E medionan aki lo wordo asigna na gemeente via un subsidio specifico. Ademas, e FAD-nan cu ta afilia na organizacion di sector Discriminatie.nl lo traha bou di un solo nomber for di 1^e di januari. Paso di e cambio di nomber ta un paso grandi pa miho buscamiento di e FAD-nan, lo pidi atencion pa esaki mediante un campaña.

Na september, e minister di AIR lo informa Kamer mas detayamente tocante reforsamento di e FAD-nan.

Intruducccion di ley di trato igual na Bonaire, Sint Eustatius y Saba.

Constitucion, incluyendo articulo 1, ta aplicabel den henter hurisdiccion di Hulanda, pues tambe den e organizacionnan publico di Hulanda. Articulo 1 di Constitucion ta desaroya den un cantidad di ley di trato igual, cu ta probibi discriminacion riba e basenan menciona den nan. Te cu awe, e leyman aki no ta aplicabel na e parti Caribense di Hulanda. Den e carta di 23 di januari 2023 pa Kamer, minister di BZK a compromete pa inicia e trayecto legislativo pa declara e leyman di trato igual aplicabel na e parti Caribense di Hulanda.¹² Cu e proposicion aki, manera ya menciona, e leyman di trato igual ta aplicabel completamente na Bonaire, Sint Eustatius y Saba (e islanan BES).

Sinembargo, legislacion so no ta suficiente pa preveni y combati discriminacion efectivamente. P'esey lo tin tambe un servicio contra discriminacion pa meld acusacion gratis, yudansa y conseho den caso di discriminacion. Tambe, Colegio pa Derecho Human ta haya un encargo evaluativo riba e tres islanan. Dia 1^e di juni 2023 a cuminsa e proposicion di Ley di Proteccion contra Discriminacion na BES, cu ta tuma luga via internet.¹³ E periodo di consulta ta dura te dia 1^e di augustus 2023.

Elaboracion concreto di aspecto institucional di e proposicion (estructura di un servicio contra discriminacion y e autoridad pa control pa Colegio pa Derecho Humano) ta den preparacion actualmente. Esaki ta tuma luga den consulta cu Ministerio di Husticia y Seguridad (HS), pasobra ta spera cu e servicio contra discriminacion ta bira parti di un servicio nobo pa asistencia first-line (loket legal) na BES. E idea ta cu lo tin un 'porta' pa asistencia legal first-line, incluso den caso di discriminacion. Sigur ta cu tambe Colegio, Discriminatie.nl y Ministerio di HS ta involvi den e preparacion, y, den cuadro di consulta, tambe ta inclui e instancianan publico.

¹² Kamerstukken II 2022/23, 36 200 IV, J.

¹³ <http://www.internetconsultatie.nl/gelijkebehandeling/b1>

Durante e tratamiento parlamentario di e proposicion di ley, cu ta spera cu ta tuma luga na 2024, e preparacion practico pa e loket y Colegio lo sigui tuma lugar. Elaboracion di e medionan financiero pa e institutonan menciona ariba for di 2024 a tuma luga durante e *voorjaarsnota* y no ta cay riba gasto di e €200 miyon di pasado di sclavitud.

Pa finalisa

Cu entrega di e carta aki na Kamer, nos ta na e drempel di apertura solemne di Aña di Conmemoracion di Pasado di Sclavitud. Un aña den cual nos ta para keto na pasado, pero tambe premirando e condicionnan pa un futuro conhunto. Nos ta constata cu tin hopi interes social pa e actividadnan, reunionnan y lesnan den henter e pais. Esaki ta importante pa realmente haci e pasado conhunto aki un historia di nos tur.

Cu e proceso y progreso riba e compromisonan, nos kier tuma paso cu descendiente y otro persona involvi, pa logra un mayor atencion duradero y reconocemento di pasado di sclavitud; y pa contribui na e lucha contra su impacto. Esaki ta pidi un esfuerso di Kabinet, pero tambe un proceso social mas amplio di conscientisacion, sanacion y procesamento di e pasado, caminda tur hende por participa. Cu e pasonan cu nos ta tuma awor, e Kabinet kier haci un aporte importante na esaki.

Minister di Asunto Interno y Relacion di Reino

Hanke Bruins Slot

minister di Relacion Externo,

Wopke Hoekstra

minister di Enseñansa, Cultura y Ciencia,

Robbert Dijkgraaf

minister di Asunto Social y Laboral,

C.E.G. van Gennip

minister di Proteccion di Ley,

F.M. Weerwind

secretario di relacion di Reino y Digitalisacion,

Alexandra C. van Huffelen

secretario di Salubridad, Bienestar y Deporte,

Maarten van Ooijen

secretario di Cultura y Medio,

Gunay Uslu